

in Babylonem Ægypti. Sub Engaddi juxta mare Mortuum sunt *arbores pulcherrima*, sed fructus earum, quando decerpuntur, intus favilla & cinere pleni inveniuntur. *Montes Engaddi* sunt valdè alti, mirabilem præ se ferentes dispositionem: nam habent tam præruptas rupes casum minantes in valles subjectas, ut videntibus & transeuntibus timorem & terrorem incutiant. A Jerichò quatuor sunt leucæ contra Occidentem, via quæ ducit Hierosolymam ad sinistram Quarentanæ, ad castrum *Adamim*. *Adamim*, ubi scilicet ille, qui descendebat de Hierusalem in Jericho, incidit in latrones, Luc. x. 30. id quod his temporibus adhuc multis contingit, & ob id ab effusione sanguinis frequenti nomen accepit. Est locus ipse visu horribilis, & periculosus valdè, nec quisquam eum audet pertransire sine conductu. Ab Adamim una leuca contra Occidentem est *Bahurim* de tribu Benjamin, de quo fuit Semei filius Jemini, qui maledixit David, 1 Reg. 11. 8. & est *castrum pulchrum* in monte alto situm. De Bahurim contra Occidentem ad duos jactus arcus est *Bethania*, castellum Marthæ & Mariæ, Joh. xi. 1. ubi peregrinis adhuc ostenditur domus Simonis leprosi, & *sepulchrum Lazari*, in quo resuscitatus fuit à domino, tectum lapide marmoreo & ff. 38, 39, 41, 43, 44: in quod ego ut reliqui descendi. Recedendo à Bethania non videri potest Jerusalem ob interpositum montem Oliveti, sed conscenso quodam terræ tumore, videtur pars quædam civitatis unà cum monte Sion.

C A P. V I I I.

Descriptio civitatis Hierosolymitana.

JERUSALEM itaque civitas Dei summi, de qua dicta sunt gloriosa, posita est in *terra montosa*: montes enim sunt in circuitu ejus, habetque in circuitu terram fertilem & bonam, præterquam ad Orientem & versus Jordanem. Distat ab *Acone* triginta sex leucis, quæ scilicet est contra Aquilonem: à *Sebaste* vero sive *Samaria* distat sedecim leucis: à *Sichem* octo, & à *Nazareth* viginti septem; & hæc loca omnia sunt versus *Aquilonem*. A *Joppe* verò distat octo leucis *inter Occidentem & Aquilonem*, à *Jericho* septem versus *Orientem*, à *Bethleem* duabus, ab *Hebron* octo, & hæc civitates sunt ad *Austrum*. Posita est itaque hæc urbs ab *Austro* in latere *Montis Sion*, & ab *Occidente* habet montem *Gion*, nec est hodiè situs ejus mutatus ut aliqui fabulantur, quum ob locorum munitionem transferri non possit à pristino situ. Est quidem nonnihil ampliata in latum, sed non in longum, quum à parte arcis & montis Sion extendi non possit, siquidem mons ille supereminet, intra muros tamen civitatis conclusus, amplissimus, qui per se ferè civitati fundum præstare posset: nam initium sumit à porta aquarum sive *fontis Silobæ* versus Orientem, & suo tractu per Meridiem usque ad Occidentem ferè semicirculum describit, rupe prærupta semicirculum hunc cingente & consolidante. Concavitas verò hujus semicirculi quum versus civitatem exinanita esset, ut non commodum fundamentum castro esse potuerit, plurimum negotii priscis regibus fecit, quousque oppleretur. Porro à parte Occidentis, ubi jugum montis initium sumere diximus, sita est *Turris David* in quodam colle ipsius præruptæ rupis, habebatque à tergo voraginem quandam, quæ venit à parte Australi montis Sion, & in hujus turris angulosè reflectens gyrabat versus Orientem, dividebaturque in *duas valles* profundas, quarum *una* vergit ad Aquilona, *altera* ad Orientem, alium scilicet constituentes angulum, oppositum illi angulo, cui innititur turris David. Proinde *vallis* quæ à turri David descendebat contra latus Aquilonare montis Sion usque ad montem *Moria*, & reflectitur in Orientem, separabat montem *Moria*, in quo fuit templum, à monte Sion, & totam inferiorem civitatem, extendebaturque usque ad torrentem *Cedron*, per locum ubi nunc est porta aquarum inter montem Sion & *palatium Salomonis*, quod ædificatum fuit in *parte Australi montis Moria*, & hoc pacto cingebat vorago illa ex omni parte montem Sion, & hæc erat *civitas David*. Verum nunc vorago ipsa tota repleta est, relictis tamen vestigiis prioris concavitate. Altera verò vorago seu vallis, quæ ab ista juxta turrim David dividebatur, pro-

*Turris
David.*